

TIMOTEYON ISTE II

Tauamboen Timoteyo chiaid

1 ¹Pabado nebi. Nuquin Papan tantiacpadomboen Esuquidistun: —Ēbi chuibeneta —caidquio nebi. —Ambi chiampicpadomboen aton Mado Esuquidistu tantiaquid ünēsacsho Nuquin Papan abēdi tabadmendac —quequin Esus chuibenequidquio nebi. ²Con mado icbobimboecquid mibi neque. Mibi chuiquin nēid dada uanu, Timoteyo. —Nuquin Papan aton Mado Nuquin Icbo Esuquidistubēdtan bēdamboen isquin bēdambo icmepashun —quequin mibi tantiembi.

Chieshtoenuio icquin Esus chuiban, quiaid

³Con tsusedpabon nacpadomboen Nuquin Papauidi tantiaquin ambi chiacpadomboen natiadquio iquebi. Adquid icquin Nuquin Papa mibi chianembi. —Mibi tantiaquid Timoteyo bēdambo iquec, Papa. Adquio icmec mibi bēdamboshē iquec. Adquiuidi icmeta, Papa —quequin Nuquin Papa chianembi. ⁴—Ēbi nidnu —quesho tantiash mibi shubiondaid tantiec mibi iste bunquiebi, mado. Ambo nidash mibi isec cuishonquetsiabi. ⁵Naden mibi tantiembi. —Aton chichi Doida caidēn ani Eunisebēdtan aid daēdshumba Esus tantiabenquiacpadomboen Timoteyonsen nēbi Esus tantiaquiec —quequin mibi tantiembi. ⁶Adquid

icsho mimbi tantiondaid padpiden mibi chuinu. —Min Mayan nēidbēd tabadmequin cuesambo icmequin Esus chuibame, Papa —quequin mibi mamishquin Nuquin Papa chiondambi. Adoac aton Mayan mibēd tabadmiac. Adoaid icquin dacuēdenquio icquin Esus chuibanta, mado. ⁷¿Nuquin Papan aton Mayan nuquibēd icmiacta nuqui natia dacuēdpē? Padenquio. Comapenen tantiaquid yec nuquibēd icquin nuqui cuesambo icmec. Adembidi Nuquin Papan Mayanēn tantiamiac nuqui matses bēdamboen tantiec. Adembidi nuqui icsate bunaid namenquio icquin mēmunquidquio icnuc nuqui bēdambo icmec.

⁸—Adoaid nebi —queshun dacuēdenquio icquin Nuquin Icbo Esus chuibanta. Adembidi dacuēdenquio icquin: —Pabado tantiaquiembi —cata. —Quēnēn nauedtsaid Pabado tantiatiapi —quenda. Utsibon cuestiadquio icquin chieshēnaqui Nuquin Papan namiacpadec chieshtoenuio icquin Esus chuibanuna. ⁹Nuquin Papan: —Bēdamboec tabadquid icmequin con Mado Esus tantiamembi —caido icquin adonona. ¿Nuqui bēdamboecuidi tabadshoda Nuquin Papan nuqui bēdamboen isbempondash? Padenquio. Ēndenquimboshē nidaidbēdta matses uabi Nuquin Papan: —Ēmbi chiaid niac-niaquec icsambo icboedēmbi con Mado Esus tantiasho cuidenquio

iquendambi —quequin ambi
 chuipampicpadomboen nuqui Esus
 tantiamiac. ¹⁰Aden ambi chuipampid
 tantiamiabi icshumbic nëbi Esuquidistu
 matesmeshun mates tantiamiac.
 Adoac: —Abi tantiaquid unēsacsho
 icsaido cuidacno nidmenquo icquin
 unēstiapimbo icquid icmequin Nuquin
 Papa yacno abēdi Esuquidistun
 tabdendac —quequin nuqui tantiec.
¹¹Aden tantiaquin Esus
 chuibenequidquo nebi. —Ēbi
 chuibeneta —Esusēn caondaid yec
 Nuquin Papabēdta Esus
 tantiaquidquo nebi. ¹²Aden
 chuibeneshobini chieshēnquin quēnēn
 nauedondash. Adoacui
 chieshtotiapimbo icquin Esus tantiambi.
 —Ēmbi tantiaidquo comapenen
 tantiaquin nabanquidquo Esus nec.
 Adquid icquin: “Ēbi tantienquo
 yanushe,” qeshun abi tantiaquidquin ēbi
 chieshtomenquo iquendac. Nidaidēn
 choabi icquin Esusēn ēbi chieshtoenquo
 icquid icmendac —quec dacuēdenquo
 iquebi. ¹³Tantia, mado. Mibi chuinu.
 Ēmbi abimbo chiondaidquo chuiban:
 —Nuquin Papan chiaidquo nec
 —qeshun. Esuquidistu tantiaquinc
 mates tantiaquinc caquin adenuidi
 chuibanta, mado. ¹⁴Nuquin Papan
 Mayan nuquibēd iqueque. Aidēn namiac
 Ēmbi chiondacpadomboen Nuquin
 Papan chiaidquo chuiquin Esus
 chuibanta, mado.

Onesipodo chiaid

¹⁵Ēmbi: —Cho —cac choenquo
 icboed mimbi tantiac, mado. Nidaid utsi
 Asia caid yacnocquido dadpen adec
 choenquo iccosh. Edemoquenes caid
 choenquo iccosh. Adecbidi Piquedo
 caid chedo. ¹⁶Onesipodo caidēn nëbi
 bēdamboen isposhi. Ēbi quēnēn
 nauedacsho dacuēdenquo icquin

isuan-isuanquin bēdambo icmioshi.
 Adsho isun: —Aton shubun
 icquidobēdta aid bēdamboen ista, Papa
 —quequin Nuquin Papa chianembi.
¹⁷Aidēmbi nēmbō shubu dadpen icquid
 Doma caid yacno choboshon:
 —¿Mitsimbo Pabado icpec? —quequin
 yuen nibēmbenequin istuidpondashi.
¹⁸Mimbi isnubi Epeso yacnoshon
 aidēmbidi baded-badedquien
 nashundeniondashi. Adsho tantiahsun:
 —Nidaidēn padpidec choshon Nuquin
 Icbon Onesipodo bēdamboen isplashun
 —caimbi.

Chieshtoenquo icquin chuiban, quiaid

2 ¹Chieshtoenquo icquin Esus
 chuibanta, mado. —Esuquidistun
 ēbi bēdamboen isec. Aidēn bēdambo
 icmiac dayacquo icquin naimbi
 —qeshun chieshtoenquo icquin Esus
 chuibanta. ²Mates dadpenshun
 tantianuc ēmbi chuibansho mimbi
 tantiondac. Ēmbi aden chiondaid
 utsibotsen chuiban. Adshun mimbi
 chuiboedo abentse-abentsen chuita.
 —Nēidēn chieshtoenquo icquin Esus
 chuibantsiash —qeshun: —Mimbitsen
 chuiban —cata, mado. ³Sondado
 bēdambo icquidēn nacbimboen
 chieshtoenquo icquin bēdamboen
 nabanuna. Matesēn chieshēnubi
 Esuquidistun chiacpadomboenuidi
 nanuna chieshtoenquo icquin.
⁴Sondadon: —Mibi bēdambo iquec
 —camenuen aton chuquid dapan
 chiacpadomboenuidi naquid. Ambi
 tantiaid nainquo icquinc utsibon
 chiacpadomboen nainquo icquinc
 caquin aton chuquid dapan
 chiacpadomboenuidi naquidquo
 sondado nec. Adomboembidi Nuquin
 Icbon chiacpadomboenuidi nanuna,
 mado. ⁵Ma nuquin mates
 titinquequidquo. ¿Mitsipadquo icpec?

Aton uidën tanec aton matsesën
 chiaction abia titinquec chosho:
 —Bëdamboec titinquiosh —qeshun
 mauete menequid. Ambi chiaction
 titinquibi icsho mauete menenquio
 icquid. Adembidi: —Mimbi bëdamboen
 naoc —Nuquin Icbo camenuen ambi
 chiacpadomboen chieshtoenquio icquin
 nabanuna, mado. ⁶Ma nuquin matses
 tied uauquidquio. ¿Mitsipadquio icpec?
 Chonoadquidënquio dayacquo icquin
 aton tied uashun ambi nitsinaid pequid.
 Adembidi Esus chuibanquid icquin
 dayacquo icquin Esus
 chuiban-chuibanuna ënenquio icquin.
 Adoac utsibon Esus tantiabentsiash.
⁷Aden ëmbi chuiboed tantiata. Adsho
 Nuquin Icbon mibi bëdamboen
 tantiametsiash.

Esuquidistu tantiata, quiaid

⁸Utsibon chieshënubi Esus tantiata,
 mado. Aidi matsesash isadaidbo tsusedpa
 Dabidën tsyuecquid nepanëdash. Nuquin
 Papan uincuemënëdaidquio yec abi
 iquec. Aidquio tantiaquiota. Aid
 chuibenequidquio nebi. ⁹Aden chuisho
 chieshënquin bedshun icsambo icquid
 uidën uacbimboen shocosh nacenaidën
 mëtaniac mëyadebi. ¿Ëbi aden uidën
 uacbimboenda Nuquin Papan chiaid
 uidën uapadic? Padenquio. Ëmbi
 chuibenetiapimbo icnuc Nuquin Papan
 chiaid chuibanquido utsibon adembidi
 chuibenendac. ¹⁰Adnubi: —Aden Nuquin
 Papan ambi tantiactedi Esuquidistu
 tantiamendac. Aid tantiaquido unësacsho
 cuidoquio icquin abëdi tabadmendac
 —quec chieshtoenquio iccobi quënën
 nauedonda yequi. ¹¹Naden abimbo
 chiaidquio tantiash chieshtoenquio
 iccobi.

—Abi bunaid ënshun Nuquin Icbon
 chiacpadomboen naquid
 chieshëmënküidën unës uacsho

Nuquin Icbon abi yacno abëdi
 tabadmendac.

¹²Utsibon chieshënaqui
 chieshtoenquio icquin Esus
 tantiec unësash abi yacno
 nidendac. Nidacsho chuquid
 icmiac utsibo namendac.
 “Esus tantiatiapimbo iquebi,”
 quequidobc: “Ëmbi tantiacmaido
 neque. Nëid nuquibëdi
 tabadmenquien ictiad, Papa,”
 quequin Esusën Nuquin Papa
 chiendac.

¹³Aden abi tantiesabon ambi chiaid
 niac-niacsho isun Nuquin Icbo
 Esusën ambi chiacpadomboen
 naquidquio icquin icsaido
 cuidendac.

Adembidi ambi chiacpadomboen
 abi tantiaquido bëdambo
 icmendac

—quequin chiaid tantiashun ambi
 chiacpadomboen naquin Esusën naid
 chuibanuna chieshtoenquio icquin.

Nuquin Papan chiaid isbanta, quiaid

¹⁴Ëmbi dada uaquin chuiboed mibëd
 icquido naden chuibanta, mado.
 —Nuquin Icbon nuqui isnubi Esusquio
 chienquio yec ambembi chiaid chiec
 mibi chushcananqueique. Adenda. Adec
 chushcanansho tantiash matses icsambo
 yaneque. Padi —cata, mado. ¹⁵—Mibi
 bëdambo iquec —Nuquin Papa
 camenuen bëdamboen nata.
 —Dacuëdtiapimbo iquebique. Ëmbi
 naid ma Nuquin Papan isnu —qeshun
 adota. Ambi chiaid bëdamboen
 isbanshun chieshtoenquio icquin
 Nuquin Papan chiaidquio chuibanta,
 mado. ¹⁶Ambembi chiaid chuquidobëd
 onquec tabadenda. Adec onquequido
 icsambo icboedi buëdanqueic Nuquin
 Papan chiaid niac-niaquec icsamboshë
 yaneque. ¹⁷Tosho bedacimboc

adquidën chiaid tantiaquido dadpen yaneque. Adquidën chuisho tantienda. Aden chuiquid Imeneyo caid nec. Adquidbidi Pideto caid nec. ¹⁸Aidon Nuquin Papan chiaidquio chienquio icquin muaquin chiec. —Esus tantiaquido unësabi icquido nëbimbobi uincuenacimboec icpec. Unësacsho aton dada chuca uaquin uincuemenquio iquendac —quequin muaquin chuisho tantianshun utsibon Nuquin Icbon chiaid tantienquio yanac. ¹⁹Aidon Esus tantiabien icchitash. Nuquin Papan Esus tantiamiac ënenquio icquin Esus tantiatsempanëdash. Padnuc Esus tantiaquidombo dadpen iquec. Adquido chuiquin ambi dada uamepampicpadomboen: “ ‘Ëbi tantiaquidombo nec,’ quequin Nuquin Icbon tantiec.” Adnuc Esus tantiaquidën: —Con Icbo Esus nec —qeshun ambi icsamboen naid ënendac.

²⁰Esus tantiaquido nadquio iquec. Shubu dapan tsitsan tabëcaid tabadacimboecquid nec. Tsitsan abentse-abentsec icsactsëcquio icnubi utsi-utsiec bëdambo iquec. Icsactsëcquidën icsa secanun sandoquid yendac. Bëdambo icquidën di nandoquid yendac. Adecbidi Nuquin Papan shubun tabadtequido iquec. Utsi-utsiec Nuquin Papan chiaid natiadquio yec Esus tantiaquidquio icnubi utsi-utsiec abi icsaid ënabi: —Esus tantianu —quetsëcquid iquec.

²¹Esus tantiaquidquio ictiadquio yec: —Muaid chuisho tantiatipimbo icquin nëbi Nuquin Icbon chiacpadomboen natiadquio iquebi —quiash Nuquin Icbon yuambo yantsiash. Adsho Nuquin Icbon bëdamboen nametsiash.

²²Caniabon mëmunenquio icquin abi bunacpadomboen naquid tanenda, mado. Adenquio yec bëdamboec

tabadte bunquiota. Nuquin Papan chiaid niacte bunenquio yec: —Nuquin Icbo Esus nec —quequidobëdtan chieshtoenquio icquin Esus tantiata. Matsesten tantiec bëdamboec isanec bëdamboec tabadta. ²³Mibi yacnoshon ambembi chuiquidon: —Mimbi icsamboen tantiec —canuen: —¿Mitsipaden mimbi tantiape? —cac chienda. Adquidën chuisho tantias matses chushcananondashe. Aidën chiac chienda. ²⁴Nuquin Papan chiaid chuibanquid chushcananenquio icquid nendac. Chieshëmënenquio icquin aton matses bëdamboen isquid nendac. Adembidi nëishënenquio icquin Nuquin Papan chiaid tantiamequid nendac. Utsibon chieshënaquí chieshënanenquio icquid nendac. ²⁵Esus tantiesabon: —Mimbi Nuquin Papan chiaid chuisho tantiatipimbo iquebi —cac adembi nëishenquio icquin Nuquin Papan chiaidquio chuibanendac. —Nuquin Papan ambi chiaidquio tantiamiac: “Icsamboen naombi,” quequin ma Esus tantiesan tantiabenu —quequin aden chuibanendac. ²⁶—Aden Nuquin Papan ambi chiaidquio tantiamiac Esus tantienquio icboedëmbi Esus tantiabenshun abi yuaquidën Satanasën namiaid ënendac. Aden Nuquin Papan chiacpadomboen naindac —qeshun chieshtoenquio icquin Nuquin Papan chiaidquio chuibanendac abi chuibanquidën.

Icsambo icquido iquendac, quiaid

3 ¹Tantia, mado. Mibi chuinu. Esus padpidec choabi icnuc matses dadpenquioshë icsamboshë iquendac. ²Nadquido iquendac. Nëidic utsi tantiatipimbo yec abiuidtsëqui datantiadquido. Nëidic piucquid bedte comapenec bunquidombo. Nëidic: —Is. Ëmbimbo naiduidi bëdambo iqueque

—quequido. Nēidic utsibo chieshēnec icsamboec onquequido. Nēidic amēn chiaid niac-niacquido. Nēidic anin chiaid niac-niacquido. Nēidic aton na nashunaqui nashumēnenquo icquido. Nēidic Nuquin Papan chiaid niac-niacquidombo. ³Nēidic aton matses tantiesabo. Nēidic chiesh bēdanesabo. Nēidic muauanquido. Nēidic abi icsate bunaid ēnenquo icquido. Nēidic cuesanquido. Nēidic bēdambo icquid chieshēnquido. ⁴Nēidic bēdambo icquid damianquiashic cuesunianquido. Nēidic bēdamboen tantienquo yec badedi icsa uanquido. Nēidic: —Ēbiuidtsēqui bēdambo iquec —quec abibi tantiadquido. Nēidic ambi naiduidi bunquin Nuquin Papa tantiesabo. ⁵Nēidic: —Nuquin Papa tantiaquid nebi —quec muaquin aidēn chiaid niac-niacquido. Adquidtedi icsambo icquido nec. —Adquidbēduidi onquec tabadenda —caimbi.

⁶Adquidon mibi yacnoshon shubu utsin shubu utsinquien isben-isbenac caosh. Adash chidoudiquo icnubi shubun puduedshun ambembi chiaid chuibanac caosh. Aden chuisho tantiashun: —Padi —catiadquidi chidon: —Mimbi chiaid tantianu —quequin badedquido tantiac caosh. Nuquin Papan chiaid niacash adecbidi icsate bunquieq tabadac caosh aid chidobo. ⁷Aden icsambo icquidēn ambembi chuidenesho tantianeshun Nuquin Papan chiaidquido tantiatipimbo icpac caosh aid chidobo. ^{8,9}Aid chidobo chiec muaquido icsambo icpampidobimboec iquec. Icsambo icpampid abentsēc Canes cuēmēdnubi utsi Mambades cuēmēdpampic. Isadaidbo tsusedpa Moisesēn Nuquin Papan chiaidquido chuisho tantiashun aidon: —Mue nec. Ēmbimbo comapenen tantiaquin ismenu —queboedombi

bēdiactsēc tantiaquin nacnenuidpampic. Adsho isun: —Abimbo cainquo iccosh. Muachitosh —capampic matsesēn. Adembidi chido chiec muaquidon icsate bunquin ambi chiaid chuitiapimbo icsho Nuquin Papan bēdamboen istiapimbo iquec. Adembidi aidon muaquin chuisho tantiashun matses dadpenshun: —Muequi nec —capendac.

Nuquin Papan chiaid isbanec bēdamboec tabadte

¹⁰Ēbien muaquidpenquo nec. Ēmbi naid ma mimbi tantieyoc. —Ma Esus tantianu —quequin Esusēn naid chuibanec bēdamboec tabadondabi. Esus tantiaquidquido icquin matses tantiaquin Esusēn naid chuibeniondambi. Chieshēnaqui chieshtoenquo icquin adembi chuibeniondambi. ¹¹Ēmbi aden chuibansho isun chieshēnondashi. Shubu dadpen icquid Antioquiya caid yacnoshon ēbi: —Cuesnu —casha Nuquin Icbon nac padenquo icpondash. Adshumbic shubu dadpen icquid utsi Iconio caid yacnoshontsen adembidi. Adshobini shubu dadpen icquid utsi Disteda caid yacnoshonquo bedshun cuēnoten se-sequin unēs uatsempondash. Adsho Nuquin Icbon nac unēsenuquo iccondabi. ¹²Ēbipadquido Esus tantiaquidotedi bēdamboec tabadtiaquido icsho adembidi utsibon comapenen chieshēnendac. ¹³Padnuen chieshēmēnquidobēd bēdambo icquid damianquieq muaquido bēdiactsēc icsambo icboedi muauananquieq buēdanquieq icsamboshē yanendac. ¹⁴Mibi adquidpenquo nec, mado. —Ēmbi isondaidon bēdambo icquidon abimbo chuibanondashi —quec Nuquin Papan chiaid niaquenquo yec bēdamboec tabadta, mado. ¹⁵Ēnden

bacuëmpi icquin Nuquin Papan chiaidquio min matsesën chuibansho mimbi tantianëdac. Adshun: —Aton Mado Esus tantiaquid unësacsho abëdi Nuquin Papan tabadmendac —quequin mimbi tantiabenëdac. Aden Nuquin Papan bëdamboen iste tantiametembo Nuquin Papan chiaid nendac. ¹⁶Nuquin Papan chiaid aton Mayanën tantiamiac matsesën dada uapampic. Aidën chiaid abitedimbo bëdamboshë iquec. Aid isec onquequin: —Nuquin Papan chiacpadec bëdamboec tabadnuna. Esus tantiaquido yec icsainquien ictiad —quequin abi chuibanquidën chuibanec. Adembidi: —Esus tantiaquido adesa. Padi. Bëdamboembien natiad —quequin chuibanec. ¹⁷Nuquin Papan: —Ëmbi chiaidquio tantiashun Esus tantiaquinc matses nashunquinc caic Esus tantiaquido ma bëdamboec tabadnu —quequin ambi chiaidquio dada uamepampic.

**Nuquin Papan chiaid
chuisho tantienquio yaid**

4 ¹Nuquin Papabëdtan Esuquidistun mibi iseqe. Bëdamboen nata. Esusën nidaidën padpidec choshon abitedishun Icbombo icquin unësaido uincuemiado unësabi icquidobëdta chiendac. —Nëid ëbi tantiaquid ëbëdi tabadmemb. Nëid ëbi tantiesa cuidemb —quequin chiendac. ²Aidën chiacpadomboen naquin Nuquin Papan chiaidquio chuibanta, mado. Matsesën tantiatiadquio icnuc adota. Tantiatiapimbo icnubi adembi chuibanta. Esus tantiaquido icsasho isun: —Esus tantiaquido adesambo neque. Bëdamboembien natiad —quequin nëishëmënenquio icquin chuita, mado. Utsibo bëdamboec tabadsho: —Mibi bëdamboec tabadoc. Aduidequi tabadta —quequin

chieshtoenquio icquin chuita. Bëdiactsëc tantiatsëcquido: —Esus tantiaquidon nadoquid —quequin chuibanta, mado. ³—Yuecshun Nuquin Papan chiaidquio matses dadpenshun tantiatiapimbo iquendac —queshun nata, mado. Aden tantiatiapimbo icquidën Nuquin Papan chiaidpenquio chuisho tantiash: —Mimbi ëbi bunaidquio chuisho tantianu. Ëbi chiech cho —quequin muaquid utsi-utsien abi yacno puduedmendac. ⁴Pamumëdacbimboecquin Nuquin Papan chiaid tantienquio icquin tsusedpabon ambembi chiampiduidi tantiendac. ⁵Aidën nacpadomboen nainda, mado. Nuquin Papan chiaidquio bëdamboen tantiaquid yec bëdamboec tabadta. Adsho utsibon chieshënaqui chieshtoenquio icquin Esusquio tantiata, mado. Adembidi Nuquin Papan bëdamboen iste Esus tantiesabo chuibanta. —Esus chuibanquidën nadoquid —caidtedi nabanta, mado. ⁶—Ëbi unës uan ëmbi nacpadomboen: “Adota,” mibi caquid nibëdtsiash —queshun mibi aden chiech nebi. Nëbi Nuquin Papan tantiacpadën chieshëmënenquidon ëbi unës uaic. ⁷Utsibon chieshënubi ënenquio icquin Esusën naid chuibeniombi. —Ëbi bunaid bednu —quec comapenec titinquiacbimboen dayacquio icquin Nuquin Papan chiaidtedi naombi. Chieshtoenquio icquin Esus tantiaquidquio nebi. Adshobini nëbi unës uaic. ⁸Unës uacshobini matsesën naid abitedimbo tantiaquidën Nuquin Icbon: —Ëbi tantiaquin ëmbi chiacpadomboenuidi naic mibi bëdambo iccoque. Nuquin Papa yacno ëbëdi tabadmequin mibi bëdamboshë icmendambi —caindac. Abi chote ushën choshon aden Nuquin Icbon ëbi chiendac. Adembidi abi chosho iste

bunquidotedi abi tantiaquido Nuquin
Icbon abëdi tabadmendac.

Timoteyo: Cho, caid

⁹Nëbimbobi ëbi isec cho, mado.
¹⁰Utsibo nidanebon ëbentsëqui
tsadebique. Demas caid aton na
bedteuidi bunec ëbi nianec shubu
dadpen icquid Tesadonica caid yacno
nidosh. Quedesente caidic nidaid utsi
Cadasia caid yacno nidosh. Titobic
nidaid utsi Damasia caid yacno nidosh.
Aidtedi nidanebon ¹¹Ducas abentsëqui
ëbëd iquec. Madcos bedbëtsenec cho,
mado. Ëbëdtan aidëmbi nëshunquio
Esus chuibantsiashe. ¹²Tiquico caid
Epeso yacno mibi yacno nidmiombi.
¹³Shubu dadpen icquid Todoas caid
yacno Cadpo cuëmëdquidën shubun con
na niamëdacondashe. Con dashcute
ëmbi dada uaidbëdta bedbëtsenec cho,
mado. —Abitedi buantiapimbo iquebi
—queshun nëish yua bitsi nacnenaïd
dada uaiduidtsëqui bëta.

¹⁴Shocosh nacnenquidën Adecondado
caidën comapenen chieshënondashi. Aid
Nuquin Papan cuidendac, mado.
¹⁵Nuquin Papan chiaïd ëmbi chuïsho
tantiatiapimbo icquin icsamboen
chuishunondashibique. Choquin aid
isenda: —Ëbitsen icsamboen
chuishunushe —queshun. ¹⁶Ënden
tauamboen bedshun: —Quënën
nauednu —cac cuidte chuïquid dapa
ëmbentsëqui chuïbampondambi.
—¿Mitsipadosho isun ëbi bedo?
Icsamboen nacno iccombi
—capondambi. —Ëbëd icboedon
dadpenshun: “Bëdambo icquid nec,”
quequin ëmbi naïd chuïbanac ëbi
quënën nauedquidon ëbi nidmetsiash
—queshun ëbëd icboedo: —Chiec cho
—caqui choenquio iccondash. Aden ëbi

cacuidondaido tantiaquin: —Nuquin
Papan aïdo cuidenquio icpashun
—caimbi. ¹⁷Nuquin Icbombini
nianenquio iccondash. —Isadaïdpembo
matses utsibo ma ëmbi naïd chuïbenenu
—quequin cuesambo icmepondashi.
Adondaid icshobini chieshëmënquidon:
—Cuesnu —cabededpondash. Nuquin
Icbon nac aïd matsesën unës uainquio
icpondashi. ¹⁸Padpiden
chieshëmënquidon ëbi caic: —Ma
mëyanac chieshtoshon Esus tantienquio
yanu —casha Nuquin Icbon nac
chieshtoenquio ictsiabi. —Nuquin
Icbombidi abi yacno ambi matses
dadpen namiacno abëdi ëbi
tabadmendac —queshun: —“Nuquin
Icbo bëdamboshë iquec,” canuna
ënenquio icquin —caimbi.

¹⁹Mibi yacnocquido: —Mibi caic:
“Unësquio iquec,” quïosh Pabado
—quequin chuïban, mado. Nëidic
Aquida caid. Nëidic aton chido Pidisida
caid. Nëidic Onesipodo caid chedo.
Aidtedi aden chuïban. ²⁰Mimbi
isondaïd Edasto caid shubu dadpen
icquid Codinto yacno tëshëdondash ëbi
chonoc. Utsibic Tëdopimo caid aton
dada icsabudacsho shubu dadpen
icquid Mideto caid yacno nianondambi.
²¹Ue tsasi iquenuanquid taënushe.
Baded cho, mado. Doma yacnocquido
nëmbo icquidon: —“Timoteyo unësquio
iquec,” quequin dada ua —caposhi.
Nëidic Eyobudo caid. Nëidic Pudente
caid. Nëidic Dino caid. Nëidic
Quëdaudia caid. Nëidic Esus
tantiaquido nëmbo icquido utsibotedi.
Aidtedi adosh. ²²—Nuquin Icbo Esusën
abëd icquin con mado bëdamboen
ispashun —quequin mibi tantiembi.
Padi. Aidtedi chuïquin dada uaombi,
mado.